

# Առևտրի քանակական սահմանափակում. քվոտա


Քվոտան ներմուծման կամ արտահանման քանակական սահմանափակում է: Այն կարող է լինել բացարձակ կամ խառը: Բացարձակ քվոտայի դեպքում սահմանվում է որոշակի ժամանակի ընթացքում համապատասխան ապրանքի ներմուծման կամ արտահանման առավելագույն թույլատրելի քանակը: Օրինակ՝ ներկայումս ԱՄՆ Չինաստանից կարող է ներմուծվել տարեկան ոչ ավել, քան 80,197,248 քառակուսի մետր տեքստիլ: Խառը քվոտայի դեպքում ապրանքը կարող անսահմանափակ ներմուծվել կամ արտահանվել, սակայն մինչև որոշակի քանակը մաքսատուրքը ցածր է, իսկ սահմանված քանակը գերազանցելուց հետո մաքսատուրքը կտրուկ բարձրանում է: Խառը քվոտաները ներկայումս կիրառվում են գրեթե բացառապես գյուղմթերքների նկատմամբ: Օրինակ՝ կարագի ներմուծման նկատմամբ Կանադայում գործող խառը քվոտայի մաքսատուրքը քվոտայի սահմաններում կազմում է մինչև 15%, իսկ քվոտայի գերազանցումից հետո՝ շուրջ 300%:

ՀՀ-ում քվոտաներ պաշտոնապես չեն կիրառվում, թեպետ գործնականում լայն սպառման ապրանքների ներմուծումը քվոտավորվում է: Ջարգացած երկրներում քվոտաներ մինչև վերջերս լայնորեն կիրառվում էին հատկապես տեքստիլի ներմուծման նկատմամբ՝ ներքին արտադրությունը Ջարգացող երկրների անհամեմատ արդյունավետ մրցակցությունից պաշտպանելու նպատակով: Դրանք, սակայն, 2005թ-ին դադարեցվեցին՝ համաձայն դեռևս 1995թ-ին Առևտրի համաշխարհային կազմակերպության (ԱՀԿ) շրջանակում ձեռք բերված պայմանավորվածության: Սակայն, Չինաստանից տեքստիլի ներմուծման նկատմամբ քվոտաների գործողությունը երկարաձգվեց մինչև 2008թ-ը: Տեքստիլի ներմուծման քվոտաները շարունակում են գործել նաև Ռուսաստանի ու Ուկրաինայի նկատմամբ, քանի որ այդ երկրները առայժմ ԱՀԿ անդամ չեն:

Քվոտայի տնտեսական ազդեցությունը դիտարկենք փոքր երկրի համար մասնակի հավասարակշռության օրինակով:

Գրաֆիկ 77-ում ազատ առևտրի դեպքում միջազգային գինը  $P_X^1$  է, ներմուծումը՝  $X^2 - X^1$  է, ներքին արտադրությունը՝  $X^1$ , սպառումը՝  $X^2$ : Ենթադրենք՝ կառավարությունը սահմանում է ներմուծման քվոտա՝  $X^4 - X^3$  մեծությամբ: Արդյունքում ապրանքի գինը ներքին շուկայում կբարձրանա մինչև  $P_X^2$ , որի հետևանքով ներքին արտադրությունը կընդլայնվի մինչև  $X^3$ , իսկ սպառումը կկրճատվի մինչև  $X^4$ :

Գրաֆիկ 77: Ներմուծման քվոտայի ազդեցությունը արտադրության, սպառման, ներմուծման և բարեկեցության վրա



Քվոտայի ազդեցությունը մեկնաբանվում է նույն կերպ, ինչ մաքսատուրքի դեպքում՝ բացառությամբ  $b$  տիրույթի: Վերջինս արտահայտում է ներմուծման քվոտայի ռենտան, որի հասցեատերը, կախված ինչ մեթոդով է իրականացվում քվոտայի բաշխումը, կարող են լինել պետությունը, ներմուծողները, արտաքին արտադրողները և այլոք:

Այսպես, եթե ներմուծող կազմակերպություն(ներ)ը շուկայում մենաշնորհային դիրք ունեն և կարող են միջազգային շուկայում գնել  $P_X^1$  գնով և ներքին շուկայում վաճառել  $P_X^2$  գնով, ապա  $b$  տիրույթը բաժին կընկնի իրենց: Հակառակ դեպքում, եթե ներքին շուկան մենաշնորհային չէ, ապա ներմուծողները միմյանց հետ մրցելով՝ կբարձրացնեն գնման գինը և  $b$  տիրույթը բաժին կընկնի արտաքին արտադրողներին:

$b$  տիրույթի հասցեատերը կարող է լինել պետությունը, եթե վերջինս իրականացնի քվոտաների բաշխման աճուրդային վաճառք: Այդ դեպքում աճուրդով ներմուծման իրավունք գնողները պատրաստ կլինեն վճարել մինչև  $P_X^2 - P_X^1$  գումար:

Ի վերջո  $b$  տիրույթը կարող է արտահայտել նաև կաշառքի մեծությունը, քանի որ կառավարության կողմից քվոտայի բաշխման դեպքում խոշոր ներմուծողները հակված կլինեն նախապես կաշառել թույլտվություն տվող պաշտոնյաներին՝  $b$  տիրույթի չափով:

1970-ական և 80-ական թվականներին քվոտաների հետ մեկտեղ լայնորեն կիրառվում էին նաև այսպես կոչված «արտահանման կամավոր սահմանափակումներ» (*VER*): *VER*-ը ներմուծող և արտահանող երկրների միջև ձեռք բերվող պայմանավորվածություն է՝ արտահանումը «կամավոր» սահմանափակելու վերաբերյալ: Արտահանող երկիրը համաձայնվում է ինքնուրույն կիրառել նման սահմանափակում, քանի որ հակառակ դեպքում, ներմուծող երկիրը սպառնում է կիրառել կանխարգելիչ մաքսատուրքեր կամ քվոտաներ: *VER*-ի հիմնական տարբերությունը քվոտայից նրանումն է, որ *VER*-ի դեպքում քվոտայի ռենտան բաժին է ընկնում արտադրողներին և ոչ թե ներմուծող երկրի կառավարությանը կամ ներմուծողներին: *VER*-ը հատկապես տարածված էր պողպատի և ավտոմեքենաների առևտրում: 1995թ-ից ԱՄԿ շրջանակում երկրները պայմանավորվել են *VER* չկիրառել: